



Wo isch ...?

Hesch e Loch in dim Schue, däm wahnsinnig alte
sin d Fänschterläde deheim alli morsch
bruchsch Unterstitzig bim Stire verwalte
und s Auti verzegeret bim Brämse vyl z forsch
isch d Heizig kabutt und dur s Dach dropft dr Räge
dr Rugge duet weh und de kasch Di nimm bugge
s Velo isch roschtig, Ersatz wär e Säge
und im Gebiss hesch do und dert Lugge

Doch d Fachgreft sin rar und Hilf bikunnsch keini
Granggeschweschiere het s grad no eini
nit besser isch es um d Handwärgger bstellt
Das isch ebe z sträng' – het mir e Junge verzellt
au dr Polizei goot s Personal langsam us
de drausch di als zobe nimm us em Huus
und brennt di Hitte bis uffe zum Dach
isch d Hilf vo dr Fyyrweer mässig bisch schwach

So goot s ys hit alle, mir sin schwär bedroffe
an Fachgreft fählt s vo vorne bis hinde
bi dr Usbildig isch offebar nit alles rächt gloffe
und wär ebbis ka, duet lieber verschwinde
zrugg blybt denn – bestimmt nit dr Hällscht
digital aggtiv, am liebschte nur znacht
bi Pause und Fyyrobe isch är dr Schnällscht
und d work-life-balance zum Evangelium macht

Wo isch dr Bundeskanzler, eloquänt und nit stur
är sait meischtens nyt – derfyr rieht e Buur:
'Höret Kollegen, von Bonn bis Schwerin
Jetzt los mit dem Trecker und ab nach Berlin!'

Wo isch z Russland e Chef mit Wyysheit und Muet?
nit ein wo de Ukrainer yyheize duet
denn d Ljudmila in Omsk het scho ganz kalti Ohre
und s Boeuf Stroganoff isch ere im Ofe verfroore

Wo het s Parkplätz in Basel, ych ha welle go shoppe
die sin alli nimm do, wär will my ächt mobbe?
drum fahr y ganz gschmeidig rasch iber dr Rhy
und kauf elegant bi de Schwoobe dert y

Wo isch dr FCB-Präsi wo s gärn wurdi ha
wenn me emol e Match gwinne ka
duesch im Publikum mehr Lyt vom Namme här kenne
also vo däne wo unde im Ball nocherenne

Wo isch dr Israeli wo gärn wott Friede verschrybe
statt d Palestinäneser us em eigene Land go verdrybe
au dr friedlig Araber liggt mer e bitz uff em Maage
wo beidi sich d Hand gän und s Kriegsbeil begrabe

Wo isch d Bundesreetene wo au ebbis macht
und nit numme dimmlich in d Kamera lacht
si kennt jo bim Jans uff em Bundesroots-Hof
e Abteilig grinde fir Schwarznaseschoof

Die greescht Volggswirtschaft uff däre Ärde
suecht no e Chef, wo ohni Beschwärde
e Stägeli abedibbled ganz syverli und sacht
und derby nit e Burzelbaum macht

Fachgreft sind rar do hebsch dir dr Ranze
me wott nyt me schaffe und nur profitiere
yberall nyt als freyi Vakanze
statt e Bruefslehr go mache wänn alli studiere
s Fazit isch tragisch so kunnt das nit guet
es brucht jedi Frau und s brucht jede Maa
irgendwann nimmt die letscht Fachgraft dr Huet
drum steen mir jetzt zämme und pagge mit aa.